



AALAJANGIINEQ

28.11.2011

Sagsnr. 2011-058292

Dok. Nr. 772791

”Nukissiuutit nalunaarsornissaannut aamma nukissiuutinut iliuusissatut pilersaarusiornissamut isumaqatigiissut”

Postboks 909

3900 Nuuk

Tlf. (+299) 34 50 00

Fax (+299) 34 54 10

E-mail: iaan@nanoq.gl

www.nanoq.gl

Suliat takussutissartaat

Qaasuitsup Kommunia nittartakkamini nukissiuutit nalunaarsornissaannut aamma nukissiuutinut iliuusissatut pilersaarusiornissamut isumaqatigiissusiornissamut neqerooruteqartitsinini tamanut ammasumik saqqummiuppaa. Neqeroorummik tunniussinissamut aallaqqaammut 20. oktober 2011 piffissaliunneqarpoq, kisiannili piffissamut killiliussaq taanna 28. oktober 2011-mut allanngortinneqarsimasoq paasinarpoq. Neqerooruteqartitsinermut atatillugu maalaaruteqartumut ilisimatitsissutigineqarpoq, neqerooruteqartitsinermi sanaartornermi neqerooruteqartitsisarneq pillugu Inatsisartut inatsisaat nr. 11, 2. december 2009-meersoq, kingullermik Inatsisartut inatsisaatigut nr. 4-kkut, 15. april 2011-meersukkut (matuma kinguliani neqerooruteqartarnermut inatsit) allannguuteqartinneqartoq malinneqassasoq.

6. oktober 2011-mi maalaaruteqartup neqerooruteqartitsisoqartoq paasivaa, neqeroorummillu 28. oktober 2011-mi tunniussilluni.

Tamatuma kingorna piffissami taaneqanngitsumi isumaqatigiissut maalaaruteqartoq saneqqullugu neqerooruteqartumut allamut tunniunneqarpoq.

Tamanna tunngavigalugu maalaaruteqartup suliaq Neqerooruteqartitsisarnermut Maalaaruteqartarfimmut ingerlateqqippaa, neqerooruteqartarnermut inatsisip atortussaananeranut maalaarutigineqartup nassuernerana innersuussutigalugu.

Maalaaruteqartup maalaaruteqarnerminut atatillugu oqaatigaa, maalaarutigineqartup neqerooruteqartarnermut inatsimmi maleruagassat pingaarutillit saneqqussimagai. Maalaaruteqartarfiup maalaarut imatut paasivaa, tassunga pingaartumik tunngaviusoq tassaasoq, neqeroorutip ammarneqarnerata najuuffigineqarnissaa ajornarsimasoq, apeqqutip akineqarnissaata arriitsumik pisimanerata kingunerisaanik assigiimmik pineqarnissamut tunngaviusoq saneqqunneqarsimasoq, tunngavissatut toqqarneqartut naliliiffigineqarnerat ersernerlussimasoq, aammalu maalaaruteqartoq neqerooruteqartut allat najoqqutassatut tunniussaannik takusaqarnissamut itigartitaasimasoq.

Maalaarutigineqartoq maalaaruteqarnermut atatillugu tusarniaaffigineqarsimanngilaq, aalajangiineq manna taamaallaat Neqerooruteqartitsisarnermut Maalaaruteqartarfiup maalaarummik suliaqarsinnaananeranut apeqqummut tunngasuummat.

Maalaaruteqartarfiup oqaaseqaataa:

Neqerooruteqartitsisarnermut Maalaaruteqartarfik neqerooruteqartarnermut inatsimmik saneqqutsineq pillugu maalaarutinik suliaqarsinnaavoq. Neqerooruteqartarnermut inatsit taamaallaat pisortat sanaartugassaataannut sanaartugassanullu pisortanit tapersiiffigineqartunut isumaqatigiissutitut tunngasuvoq. Sanaartorneq suliatut, sanaartorfimmi, illumi imaluunniit sanaartukkami atortumiluunniit timitaatigut aalajangersimasumik naammassisaqarnissaq anguniarlugu ingerlanneqartutut nassuiarneqarsinnaavoq. Neqerooruteqartarnermut inatsimmut siunnersuisarneq ilaanngilaq.

Neqerooruteqartarnermut inatsit namminersortut sanaartugaanut atuuttussatut isumaqatigiissutigineqarsinnaavoq, tamatumalu kingunerisaanik neqerooruteqartitsinerit taamaattunut maalaarutinik maalaaruteqartarfik suliaqarsinnaavoq. Taanna neqerooruteqartarnermut inatsimmi § 1, imm. 4-mi takuneqarsinnaavoq, imm. 5-imut atatinneqarluni. Aalajangersakkami tassani taamaallaat sanaartornermut atatillugu neqerooruteqartitsisut namminersortut neqerooruteqartitsisulluunniit allat, inatsisip tunngaviusumik atuuffiginngisaasa, aalajangersakkamut nassuiaatit naapertorlugit inatsisip atuutisneqarnissaanut isumaqatigiissuteqarsinnaanerat pineqarpoq. Aalajangersagaq sanaartugassanut isumaqatigiissutitut allanut aamma atuuttussanngorlugu annertusineqarsinnaanngilaq.

Maalaarummi isumaqatigiissut pineqartoq nukissiuutit nalunaarsornissaannut aamma nukissiuutitut iliuusissatut pilersarusiornissamut isumaqatigiissummut tunngasuvoq. Isumaqatigiissutit taamaattut neqerooruteqartarnermut inatsimmut ilaatinneqanngillat. Kiisalu inatsisip sanaartornermut isumaqatigiissutit saniatigut inatsisip suliassanut allanut atuunnissaanut isumaqatigiissuteqarnissamut, taamaalillunilu maalaaruteqartarfiup neqerooruteqartitsineq pillugu maalaarutinik suliaqarsinnaasutut piginnaaneqartutut isigineqarnissaanut neqerooruteqartarnermut inatsimmi tunngavissaqartoqartoq oqartoqarsinnaanngilaq.

Tamanna tunngavigalugu sanaartornermi neqerooruteqartitsisarnermut Inatsisartut inatsisaata allanngortinneqarnera pillugu Inatsisartut inatsisaanni nr. 11-mi, 2. december 2009-meersumi § 27, imm. 3 naapertorlugu maalaarut itigartinneqarpoq.

Tamatuma kingorna aalajangerneqarpoq:

Maalaarut itigartinneqarpoq.

Thomas Trier Hansen

- - - - -

Atsiornerup eqqortuunera uppersarsarneqarpoq.

Neqerooruteqartitsisarnermut Maalaaruteqartarfik, ulloq 28. november 2011.

Janus Køster

Neqerooruteqartitsisarnermut Maalaaruteqartarfiup allattaa